

## REGLUGERÐ

52

22. febr.

## fyrir Atvinnudeild Háskólans.

## 1. gr.

Nafn stofnunarinnar er Atvinnudeild Háskólans. Aðsetur hennar er í Reykjavík.

## 2. gr.

Atvinnumálaráðherra hefur yfirstjórn Atvinnudeildarinnar með aðstoð rannsóknarráðs ríkisins.

## 3. gr.

Atvinnudeild Háskólans starfar að rannsóknum í þágu atvinnuvega landsins, og greinist í þrjár sérdeildir: fiskideild, búnaðardeild og iðnaðardeild.

## 4. gr.

Fiskideild annast rannsóknir í þágu fiskveiða. Aðalrannsóknarefni eru þessi:

Eðli sjávar (Hydrografia).

Svif (Plankton).

Botndýrasamfélög (Benthos).

Aldur og vöxtur fiska, einkum nytjafiska.

Göngur nytjafiska (merkingar).

Stærð nytjafiskastofnanna og áhrif veiðanna á hana.

Hvalstofninn, einkum áhrif veiðanna á hann.

## 5. gr.

Búnaðardeild annast rannsóknir í þágu landbúnaðar. Eru rannsóknarefni hennar einkum þessi:

Jarðvegur landsins.

Áburðarefni, innlend og erlend.

Jurtir, einkum islenzkar nytjajurtir.

Jurtasjúkdómar, þar með talin áhrif skordýra og annarra meindýra.

Fóðurefni, innlend og erlend.

Kynbætur búfjár og nytjajurta.

## 6. gr.

Iðnaðardeild annast rannsóknir í þágu iðnaðar og verzlunar. Rannsóknarefni eru einkum þessi:

Hvers konar iðnaðarhraefni.

Orkulindir landsins, aðrar en fallvötn.

Efnavarningur, innlendur og erlendur.

Matvæli, þar með taldar mjólkurafurðir og kjötafurðir, neyzlu- og nauðsynjavörur, þ. á m. niðursuðuvörur.

Fjörefni og önnur bætiefni matvæla.

Útflutningsafurðir landbúnaðar og sjávarútvegs, nema öðruvísi sé ákveðið í lögum eða samningum.

Gerlarannsóknir.

Jarðefni hvers konar.

Byggingarefni.

52

22. febr.

7. gr.  
Ráðherra getur fjölgað sérdeildum, ef ástæður þykja til að dómi rannsóknaráðs ríkisins og fé er veitt til þess í fjárlögum. Enn fremur getur ráðherra ákveðið tilfærslu á verkefnum milli sérdeilda, enda mæli rannsóknaráð með því.

8. gr.

Rannsóknaráð undirbýr að jafnaði öll mál atvinnudeildar, er leggja þarf fyrir ráðherra. Öll erindi, er berast atvinnudeild utan að og varða stjórn hennar og störf, skulu að jafnaði afgreidd af rannsóknaráði.

9. gr.

Rannsóknaráð felur framkvæmdastjóra sínum að koma fram fyrir hönd ráðsins gagnvart starfsmönnum atvinnudeildar.

10. gr.

Hverri deild er stjórnað af deildarstjóra, sem sér um dagleg störf og rekstur deildar sinnar og er hann ábyrgur gagnvart rannsóknaráði. Sérfræðingar bera ábyrgð gagnvart deildarstjóra á þeim verkefnum, sem þeim eru falin.

11. gr.

Dagleg störf, sem ekki heyra undir neina sérdeild, eru undir eftirliti framkvæmdastjóra, sem er ábyrgur gagnvart rannsóknaráði.

12. gr.

Rannsóknaráð ákveður viðfangsefni hvernar sérdeildar í samráði við deildarstjóra og þá sérfræðinga, sem að þeim munu starfa. Einnig skal það leita álits tilraunaráðs jarðræktar, tilraunaráðs búfjárræktar, Fiskifélags Íslands, eða annarra landssambanda atvinnuveganna, sem málið heyrir undir.

Gæta skal þess, að samræma störf sérdeilda eftir því sem fært þykir, og skal rannsóknaráð hafa forgöngu um það.

13. gr.

Deildarstjórar gera árlega sundurliðaðar fjárhagsáætlanir fyrir starfsemi deilda sinna á næsta ári, og skulu þær lagðar til grundvallar fjárhagsáætlun atvinnudeildar. Framkvæmdastjóri gerir tilsvarendi áætlun fyrir annan kostnað við rekstur atvinnudeildar. Deildarstjóra ber að láta sérfræðingum í té vitneskju um, hversu mikið fé er veitt til rannsókna þeirra, sem þeim eru faldar.

14. gr.

Deildarstjórum ber að láta rannsóknaráð fylgjast með, fyrir milligöngu framkvæmdastjóra, þeim verkefnum, sem eru á döfinni hjá deildum þeirra á hverjum tíma, og benda á, ef upp koma ný viðfangsefni, sem taka þyrfti til rannsókna.

15. gr.

Um hver áramót skal hver deildarstjóri gera skýrslu um starfsemi deildar sinnar á liðna árinu, þar sem tekið er fram að hvaða viðfangsefnum hver starfsmanna deildarinnar hefur unnið og hvaða árangur hefur náðst. Jafnframt ber deildarstjóra að gera grein fyrir fyrirhuguðu starfi deildarinnar á næsta ári.

16. gr.

Ráðherra ákveður í samráði við rannsóknaráð tölu fastra starfsmanna og skipar þá. Tölu annarra starfsmanna ákveður ráðherra á sama hátt, en rannsóknaráð ræður þá eftir tillögum deildarstjóra eða framkvæmdastjóra. Samþykki ráðherra þarf þó til ráðningar þeirra.

## 17. gr.

Áður en sérfræðingur er ráðinn við atvinnudeildina skal starfið auglýst til umsóknar með hæfilegum fyrirvara. Umsækjendur skulu láta fylgja umsókn sinni skýrslu um námsferil sinn og störf, er þeir hafa unnið.

52

22. febr.

## 18. gr.

Sérfræðingar geta þeir einir orðið, sem hafa lokið háskólaprófi í sérgrein sinni, þó getur ráðherra veitt undanþágu eftir tillögum rannsóknaráðs, ef ekki er völ á manni með háskólaprófi í hlutaðeigandi sérgrein.

## 19. gr.

Ráðherra skipar deildarstjóra, til þriggja ára í senn, eftir tillögum rannsóknaráðs. Deildarstjórar skulu vera fastir starfsmenn og sérfræðingar við atvinnudeild.

## 20. gr.

Ráðherra setur hverjum föstum starfsmanni erindisbréf, þar sem tekið er fram, hver séu aðalstörf hans og undir hvaða flokki launalaga hann sé ráðinn, hver sé vinnutími hans við stofnunina og hver sé vinnustaður hans. Við ráðningu annarra starfsmanna skal kveðið á um ráðningartíma eða uppsagnarfrest, hvert sé aðalstarf þeirra og með hvaða kjörum þeir séu ráðnir.

## 21. gr.

Vinnutími starfsmanna atvinnudeildar fer eftir lögum eða reglugerð um vinnutíma starfsmanna ríkis og ríkisfyrirtækja, nema öðruvísi sé um samið.

## 22. gr.

Enginn fastur starfsmaður má taka aukagreiðslu fyrir störf sín við stofnunina, sem unnin eru í vinnutíma hans þar.

## 23. gr.

Þurfi starfsmaður að vinna störf á vegum stofnunarinnar utan vinnutíma síns, skal fyrir fram samið um það við rannsóknaráð, sem leitar samþykkis ráðherra. Yfirvinna er borguð samkvæmt reglugerð um vinnutíma starfsmanna ríkis og ríkisfyrirtækja.

## 24. gr.

Starfsaðsetur atvinnudeildar telst sá staður, þar sem starfsmenn hennar vinna að staðaldri, þar með talin tilraunabú, sem rekin eru á vegum stofnunarinnar.

## 25. gr.

Þurfi starfsmaður að vinna störf á vegum atvinnudeildar utan starfsaðseturs stofnunarinnar, skal rannsóknaráði gerð grein fyrir því fyrir fram.

## 26. gr.

Ferðakostnaður starfsmanna á vegum atvinnudeildar skal greiddur eftir reikningi, sem samþykktur er af deildarstjóra. Dagpeninga ákveður rannsóknaráð með samþykki ráðherra.

## 27. gr.

Kaup á tækjum eða öðru til sérdeilda skulu deildarstjórar annast í samráði við rannsóknaráð, en sé um að ræða hluti til sameiginlegra þarfa annast framkvæmdastjóri kaupin. Reikninga á atvinnudeildina má ekki greiða nema þeir séu samþykktir af hlutaðeigandi deildarstjóra eða framkvæmdastjóra.

52 22. febr. Vöropantánir skulu deildarstjórar afhenda framkvæmdastjóra, sem lætur skrifstofu atvinnudeildar sjá um fyrirgreiðslu þeirra og útvegum nauðsynlegra gjald-eyris- og innflutningsleyfa.

## 28. gr.

Rannsóknaráði, framkvæmdastjóra og deildarstjórum ber gaumgæfilega að gæta þess að fylgt sé ákvæðum fjárlaga um fjárveitingar til atvinnudeildarinnar.

## 29. gr.

Samningar og bréf, er hafa í sér fólgnar fjárhagslegar skuldbindingar og varða sérdeildir, skulu undirrituð af hlutaðeigandi deildarstjóra og framkvæmdastjóra rannsóknaráðs, en bréf, sem varða stofnunina sem heild, skulu undirrituð af framkvæmdastjóra rannsóknaráðs.

## 30. gr.

Skyllt er atvinnudeild að taka að sér rannsóknir fyrir atvinnurekstur einstakra manna, félaga eða stofnana, eftir því sem við verður komið, gegn þóknun, sem ráðherra ákveður með gjaldskrá.

## 31. gr.

Deildarstjórar skulu annast samningu gjaldskrár, hver á sínu sviði, og leggja síðan fyrir rannsóknaráð, er afgreiðir málið til ráðherra, með tillögum sínum. Hið sama gildir með gjaldskrárbreytingar.

## 32. gr.

Þrátt fyrir gjaldskrárákvæði getur ráðherra mælt svo fyrir, að sérdeild annist rannsóknir endurgjaldslaut, ef ástæða þykir til. Skýrslur um slíka rannsóknarvinnu með tilgreindum kostnaði samkvæmt gjaldskrá skulu fylgja reikningum sérdeildanna.

## 33. gr.

Óheimilt er öðrum rannsóknarstofnunum, sem njóta styrks úr ríkissjóði, að taka að sér rannsóknir samkvæmt 30. gr. þessarar reglugerðar, nema gegn þóknun samkvæmt gjaldskrá atvinnudeildar.

## 34. gr.

Skyllt er starfsmönnum ríkisins eða stofnana, sem starfa með ríkisstyrk, að láta atvinnudeild aðstoð sína í té við rannsóknir eða tilraunir, eftir því sem við getur átt og ráðherra telur nauðsynlegt. Þóknun fyrir slíka aðstoð skal greiða eftir gjaldskrá atvinnudeildar, ef tiltækilegt er, ella ákveður ráðherra gjaldið.

## 35. gr.

Atvinnudeild hefur forgangsrétt til þess að taka einkaleyfi á þeim uppgötvunum, sem gerðar eru innan vébanda hennar. Ef starfsmaður atvinnudeildar finnur upp tæki, efni, aðferð eða annað sem hann telur ástæðu til að lögvernda, skal hann tilkynna það rannsóknaráði, er ákveður, hvort atvinnudeild skuli taka einkaleyfi á uppgötvuninni. Ákveði rannsóknaráð, að atvinnudeild skuli ekki nota forgangsrétt sinn, er þeim, sem uppgötvunina gerði, heimilt að taka einkaleyfi á henni. Fyrir uppgötvunir, sem atvinnudeild tekur einkaleyfi á, skal stofnunin greiða uppfinningamannnum 20% af tekjum atvinnudeildar af einkaleyfinu, eða eftir samkomulagi milli hans og rannsóknarráðs, með samþykki ráðherra.

Reglugerð þessi, sem sett er samkvæmt lögum nr. 68 7. maí 1940, um náttúru-rannsóknir, staðfestist hér með til að öðlast þegar gildi og birtist til eftirbreytni öllum þeim, er hlut eiga að máli.

*Landbúnaðarráðuneytið, 22. febrúar 1950.*

**Jón Pálmason.**

*Árni G. Eylands.*